

Date – 11/04/2025

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Nizan khan Aizawl Dinthar veng-a Heroin hawng 440 manna a inhnamhnawiha puh Henry Lalbiakzinga Chhundeng laka lungawilo thalai te pungkhawm lehin an lirthei an tichhe nual.
2. CADC chuan Bangladesh ramri hung avanga in leh lo leh ram chante zangnadawmna sum pe chhuak thuai turin sorkar laipui an ngen.
3. Narcotics Control Bureau ten Assam-ah Methamphetamine kg 30 leh gram 400-a rit cheng vaibelchhe 24 leh nuai 32 chuang hu an man.
4. Mumbai 26/11 firfiaka chetnaa mawphurtua puh Tahawwur Rana chu US atangin NIA ten India-ah an la let.

<><><>

DINTHAR LC

Aizawl Dinthar veng-a Heroin hawng 440 manna a inhnamhnawiha puh Henry Lalbiakzinga Chhundeng laka lungawilo thalai chu nizan khan an in kawtah pungkhawm lehin an lirthei te an tichhe nual a ni.

Hetihlai hian, vawiin hian Local Council kaihruaina in Dinthar pawl hrang hrangin ruihhlo tawlhnnaa inhnamhnawih duhloh lantir na'n kawng an zawh dawn a.

Dinthar Branch YMA President Pu C. Zochhuanawma hnen atanga Akashvani thudawn danin, Nilaini zana Dinthar LC kaihruai all NGO thukhawm chuan vawiin chawhma dar 11-ah tunhnaia ruihhlo thahnem tak, Heroin hawng 440 man chungchanga inhnamhnawiha puh, an veng mi, Henry Lalbiakzinga Chhundeng laka lungawi lohna lantirin kawng an zawh dawn a ni.

Thawhlehni zana Dinthar branch YMA executive thukhawm chuan thla hmasa March ni 15-a heroin kg 4 leh gram 722, cheng vaibelchhe 1 leh nuai 41 hu, man chungchanga inhnamhnawiha puh Henry Lalbiakzinga Chhundeng chu Vengchhung atangin an ensan thu sawiin YMA Member an nihna leh Chhiatni Fund an pe kir a. Branch YMA executive te thutkhawm lai hian Dinthar mipui thinrim chu pungkhawmin an veng ti mualphotu a an puh, Henry Lalbiakzinga chu an venga awm atan an duh lo tih sawiin, veng chhung chhuahsan turin an au rual a, mipui thinrim chuan hun rei tak chhung veng chhung hruaitute hmalakna an nghah tawh thu sawiin hmalakna a awm mai loh avangin an pungkhawm tih an sawi a ni.

<><><>

CADC

Chakma Autonomous District Council (CADC) chuan Bangladesh ramri hung avanga in leh lo leh ram chante zangnadawmna sum pe chhuak thuai turin sorkar laipui an ngen.

Union Minister of State for Home Nityanand Rai hnenah he thu hi nimin piah khan CADC hotute'n an lo thlen a. Bangladesh ramri hung avanga chhungkaw tam takin an in leh lo leh ram an chan avanga zangnadawmna atana cheng vaibelchhe 118 leh nuai 75 pe tura Mizoram sorkar kaltlanga central sorkara dilna an thehluh chu home ministry remtihna nghah mek a nih thu minister of state hnenah hian lo thlenin phalsak thuai turin an ngen a. Hei bakah hian hmasawnna hna thawk tura ruahmanna project 47, kawng siam, zirna lam, sorkar inrelbawlna, thiam thil lam hmasawnna leh hnam ziarang humhalhna atana an thehluhte tun thlenga pawmpui lohva la awm leh tiakhawtlai a ni chu pawi an tih thu leh he'ng project pawimawhte tihpuitlin theih lova a awm chu tha an tih loh thu an lo thlen bawk.

CADC thuneitute chuan an council-in sum harsatna namen lo an tawh dan Natyand Rai hnenah hian thlenin kum 2021-2022 tangka kuma council hnathawkte hlawh daih lova ruahman a nih avang khan 2024-2025 tangka kumah sum indaih lohna cheng vaibelchhe 54 leh nuai 70 chuang a awm niin an sawi a, chu chu tun tangka kum tharah hian siamrem a ngai dawn a ni an ti. Mizoram finance commission in autonomous council dang aiin CADC tan sum a ruahman tlem zawk chuan harsatna a siamsak niin an sawi bawk.

An sum harsatna, a bikin council hnathawkte hlawh indaihlohma phuhrukna atan hian a bik taka pek turin cheng vaibelchhe 70 an dil a. Union minister hnena memorandum an lo thehluhah chuan council huamchhunga inkalpawhna kawng chhe lutukte, Mizoram puma ziak leh chhiar thiam za zela 91 point 58 a nih lai a za zela 46 chauh a nih thute, zirna sang zawk tlem lutuk leh hriselna lama an hniham bik ziate tarlangin ramchhunga autonomous district council zingah CADC hi a hnufual ber a ni mek a ni, an ti.

CADC-a BJP sorkar chuan rampum huapa mitin hmasawnna kalpui mek chuan a thlen phak ve an beisei thu sawiin rei tak ngaihthah ni tawh Chakma mipui tana hmasawnna rualkhai thlen a hmasawnna atana tha an thawte thlawp turin central sorkar an ngen a ni.

<><><>

CSR

Adviser to CM (planning & finance) Pu TBC Lalvenchhunga chuan Mizoram sorkarin 'bana-kaih' hnuia mahni kutkawiha eizawngte chawikanna tur ruahmanna a siam chu thalaite'n an chhawr hle dawn a ni, a ti.

Sorkar thuchhuah tarlan danin India rama entrepreneurship tihmasawntu institute tha ber pawl, IIM Bangalore NSRCEL chuan Mizoram an rawn tlawh a. Ni thum chhung Mizoram startup leh entrepreneurs-te an zir chian hnuah nimin tlai lam khan Mizoram CSR Cell chairman ni bawk Pu TBC Lalvenchhunga nen Planning Department Committee Room-ah an inkawm a. Adviser to CM chuan Mizoram sorkarin entrepreneurship leh startup chawikan na'n 'Handholding Scheme' a duan bakah Venture Capital fund a siam a. Thalai tam takin an chhawr hle dawn a ni, a ti a. He mi lama hmalakna-ah hian NSRCEL leh Mizoram thawhhona a tha-in nasa takin sorkar leh entrepreneur-te a pui dawn ni a a hriat thu a sawi bawk.

Pu TBC Lalvenchhunga chuan Mizoram CSR Cell hminga Bangalore-a an zinna chuan rah tha a chhuah nghal chu lawmawm a tih thu a sawi a.

Bangalore-a an hmunpui an tlawh tum a, NRSCEL ten tha taka an lo dawnsawn dante a sawiin, an sawmna anga Mizoram an rawn tlawh nghal a, startup ecosystem zirchianna an rawn kalpui hi a hlu hle a ni, a ti.

NSRCEL hi startup incubation centre a ni a, IIM - Bangalore hnuai a awm an ni a. Thawktu lokal te hi Mizoram Startup Mission in lo dawngsawngin, Commerce & Industries Dept, MZU Incubation centre, TILI leh entrepreneur hrang hrangte an tlawh a. Mizoram chuan an rin aia entrepreneurship lama hma an lo sawn thu te sawiin, hmasawnna zelna tur nia an hmuh ang te an sawi nghal a ni. Mizote chu potential tha tak an nei ni a an hriat thu an sawi bawk. Pu TBC Lalvenchhunga hi Planning department Principal Adviser cum Addl. Secretary Dr. Lalrinchhana'n a tawiawm a ni.

<><><>

REFUGEES, CRIME

Adviser to chief minister (political) Pu Lalmuanpuia Punte chuan tunlai hian social media hmanga Myanmar raltnante avanga pawikhawihna pung ta thut a tihdarh chu thu dik lo leh belchian dawl lo a ni, a ti.

Pu Lalmuanpuia'n Akashvani Aizawl a hrilh danin hman ni lawka bike chesual, a chhungte hnena thudik sawi ngam lo avang ringawt pawh khan boruak a sosang hman a. Kut an thlak ni a sawi a, kutthlaktute Mizo tawng pai ni a a sawi avang khan Chin state atanga raltnante puhin tam tak chuan raltnante an dem nghal a. Police-te'n rang taka chhui chhuaka thudik an puan leh tak avangin boruak chhe tur a dai ta zawk a ni a ti a. Police-in September 2023 leh December 2024 inkara Mizorama dan bawhchhiatna thleng an chhinchhiah a an ziah luh chinah mi 3,210 man zinga za a 96 chu India ram mi an ni a, India ram mi rau rau zinga mi 2,833 (za zela 92) te chu Mizorama awm nghet an ni. Dan bawhchhetu an man zinga za zela 4 chauh hi Myanmar mi an ni a. Assam state ami hi 158 ni-in za zela 5 an tling a. Manipur mi 44 leh Tripura mi 24 te man zingah hian an tel bawk a ni a ti.

Zirlai hruaitu hlui Pu Lalmuanpuia chuan tualchhungmite'n pawi lian tak an khawih a mena thlak a nih lai-in raltnan dan bawhchhiatna pawi tham lo an khawih ve hlek chuan social media lamah a thawm a ring bik niin a sawi a. Hei hian Mizo hnam hmun hrang hranga awmte inzawmna leh inunauna a tichhe palh ang tih a hlauh thu leh hetiang zawnga unaute laka rilru chhe tak pute hi hrilhfiah an ngai a a hriat thu a sawi bawk a ni.

<><><>

MUHCS

Mizoram universal healthcare scheme (MUHCS) hnuaih damdawi-in 13-a damlo mi 131-te inenkawlna senso atan cheng nuai 6, sing 7 chuang pek chhuah a ni tawh.

Health care society CEO Dr. Biakthansangi'n Akashvani Aizawl a hrilh dani tun thla April ni 1-a MUHCS hmanga pawisa chawi lawk lo (cashless) a damlo 131 te enkawlna senso chu April ni 8, Thawlehni atang khan pek chhuah tan a ni a. Mizoram hmun hrang hranga damdawi-in 13 - Mizoram State Cancer Institute (MSCI), Zoram Medical College & Hospital (ZMC&H),

Civil Hospital Lunglei, Kolasib District Hospital, Serchhip District Hospital, Khawzawl District Hospital, Hnahthial District Hospital, Khawhai PHC, Rapha Daycare Centre, Zarkawt, Aizawl, Mamit District Hopital, Saitual District hospital, Khawbung PHC leh Chhingchhip PHC-a damlo mi 131 te bill pek chhuah tawh hi a vaiin cheng nuai 6, sing 7 chuang a ni a. Mizoram state cancer institute chu dawng tam ber niin, cheng nuai 2, sing 3, sang 5 leh 508 an dawng tawh a, ZMC-in dawtin, cheng nuai 2 sing 3, sang 5 leh 472 a dawng tawh a, Civil Hospital Lunglei chu dawng tam ber pathumna niin, cheng sing 4, sang 1, 255 a dawng tawh a ni.

<><><>

AIR NEWS ON SOCIAL MEDIA

Chanchintha hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchintha hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

ASSAM METH

Narcotics Control Bureau ten Assam-ah Methamphetamine kg 30 leh gram 400-a rit cheng vaibelchhe 24 leh nuai 32 chuang hu an man. NCB te chuan ruihhlo neitua puh mi 3 an man bawk a. Union Home Minister chuan NCB te chu fakin Modia sawrkar chuan ruihhlo tawlhtu pawl lian tak takte chu man an ni zel dawn tih a sawi a. Ruihhlo tel lo India siam turin heng ruihhlo tawlhtute lakah hian beihpui a thlak chho zel ang tih a sawi a. Union Home Minister Amit Shah-a chuan Narcotics Control Bureau, Assam Police leh CRPF te chu chhuanawm atih thu a sawi a ni.

<><><>

MUMBAI

Mumbai 26/11 firfiaka chetnaa mawhphurtua puh Tahawwur Rana chu US atangin NIA ten India-ah an la let. Union Minister Piyush Goyal-a chuan hemi chungchang hi social media-ah tarlangin Prime Minister Narendra Modia tumruhna vangin Mumbai inbeihnaa mawhphurtua puh hi India-ah lak a ni dawn tih a sawi a. Pu Goyala chuan chanchinbumite kawm bawkin [awikhawihtu hi a phu tawk hremna pek ngei anih tur thu Pu Goyal-a chuan a sawi bawk a ni. Rana-a phurh hawna tur hian a bikin thlawnha ruahman a ni a.

NIA headquarters te, Patiala Court leh hmun paiwmawh dangalte
venhimna khauh takin kalpui a ni.

Nimin khan Union Home Minister Amit Shah-a chuan Tahawwur Rana lak a ni tur chu Modia sawrkar that zia lantirtu a ni a ti a. India mipuite chunga pawikhawihnaa mawhphurtute chu sawrkarin a man zel dawn tih a sawi a ni.

<><><>

Bihar

Bihar-ah ruahsur avanga chhiatna thlengah mi 28 an thi. Chhiatna thlenna hmunte hi Nalanda, Jehanabad, Muzaffarpur, Araria leh Begusarai district ah te a ni a. Nalanda ah hian mitthi

tam berin mi 18 an thi a.State chhung hmun hrang hrangah ruahsur avang hian mipui nunphung a khaihlak nasa hle a ni. Bihar Chief Minister Nitish Kumar chuan chhiatna thleng chu pawi a tih thu a sawi a. Mitthi chhungte chu cheng nuai 4 theuh ralna sum pek an nih tur thu a puang a ni..

<><><>